

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 शनिवार

दिनांक 16.11.2024

प्रमुख समाचार –

- नारायणपुर जिला के अबूझमाड़ इलाका म आज सुरक्षा बल अउ माओवादी मनके बीच होय मुठभेड़ म दू माईलोगिन समेत पांच वर्दीधारी माओवादी मारे गीन।
- छत्तीसगढ़ के चौदह सरकारी अस्पताल ल उत्कृष्ट स्वास्थ्य सेवा बर मिलिस राष्ट्रीय गुणवत्ता आस्वासन मानक प्रमाण पत्र।
- केंद्रीय राज्यमंत्री तोखन साहू ह जांजगीर म अधिकारी मनके लीन बइठका— गुणवत्ता पूर्ण काम करे के दीन निरदेस।

माओवादी—मुठभेड़

नारायणपुर जिला के उत्तरी अबूझमाड़ इलाका म आज सुरक्षा बल अउ माओवादी मनके बीच होय मुठभेड़ म दू माईलोगिन समेत पांच वर्दीधारी माओवादी मारे गेहे। पांचो माओवादी के सब बरामद कर ले गेहे। उहे, मुठभेड़ म दू जवान घायल हे। जिला अस्पताल म प्राथमिक उपचार के बाद जवान मन ल बेहतर इलाज बर राजधानी रायपुर लाय गेहे। दूनों जवान के हालत खतरा ले बाहर बताय जात हे।

मिले जानकारी के मुताबिक अबूझमाड़ इलाका म माओवादी मनके मौजूदगी के सूचना खुफिया ढंग ले मिले के बाद डिस्ट्रिक्ट रिजर्व गार्ड डीआरजी, स्पेसल टास्क फोर्स एसटीएफ अउ बीएसएफ के संयुक्त टीम तलासी म निकले रिहीन। ए बेरा नारायणपुर अउ कांकेर जिला के सीमा म जंगल म घात लगाय बइठे माओवादी मन सुरक्षा बल मन उपर फायरिंग सुरू कर दीन। सुरक्षा बल डहार ले घलो जवाबी कार्रवाई करे गीस। ए बेरा पांच माओवादी मारे गीन। मुठभेड़ के बाद घटना स्थल ले इंसास अउ एस.एल.आर. रायफल सहित भारी मात्रा म हथियार बरामद करे हे।

उपमुख्यमंत्री अउ गृहमंत्री विजय शर्मा ह ए उपलब्धि बर सुरक्षा बल मनके जवान मन ल बधई दीन हे। ओमन किहीन हे कि नक्सल मोर्चा म जवान बहादुरी ले लड़त हे अउ ओमन छत्तीसगढ़ ल नक्सल मुक्त करे के संकल्प ल पूरा करे के दिसा म आगू बाढ़त हे। श्री शर्मा ह ए अभियान म सामिल जम्मो जवान मनके कर्तव्यनिष्ठा के सराहना करीन। उपमुख्यमंत्री ह मुठभेड़ म घायल जवान मन के जल्दीच स्वस्थ होय के कामना करत उंखर वीरता के प्रसंसा करीन।

स्वास्थ्य सेवा—गुणवत्ता प्रमाण पत्र

केन्द्रीय स्वास्थ्य अउ परिवार कल्याण मंत्रालय ह उत्कृष्ट स्वास्थ्य सेवा अउ मरीज मन बर बने ढंग ले इलाज प्रदान करइया छत्तीसगढ़ के चौदह सरकारी अस्पताल ल राष्ट्रीय गुणवत्ता आस्वासन मानक प्रमाण पत्र प्रदान करीन। एमा दस आयुष्मान आरोग्य उप स्वास्थ्य केंद्र, तीन प्राथमिक स्वास्थ्य केंद्र अउ एक सहरी प्राथमिक स्वास्थ्य केंद्र सामिल हे।

स्वास्थ्य मंत्री श्याम बिहारी जायसवाल ह गुणवत्ता आस्वासन के मानक म खरा उतरइया स्वास्थ्य केंद्र मन ल बधई दीन। ओमन किहीन कि मुख्यमंत्री विष्णुदेव साय के नेतृत्व म राज्य म स्वास्थ्य सुविधा म दिनो—दिन सुधार होवत हे।

गौरतलब हे कि केंद्रीय स्वास्थ्य मंत्रालय के बिसेसज्ञ मनके टीम पाछू महिना ए अस्पताल मन म मरीज मन बर उपलब्ध सेवा के गुणवत्ता के परीक्षण के बारे म राष्ट्रीय गुणवत्ता आस्वासन प्रमाण पत्र जारी करे हे। केंद्र के टीम ह अस्पताल के सेवा अउ संतुष्टि स्तर के आने-आने मानक के परीक्षण करे रिहीन। एमा उपलब्ध सेवा, मरीज के आधार, इनपुट, सपोर्ट सर्विस, इंफेक्सन कंट्रोल, गुणवत्ता प्रबंधन अउ आउटकम जइसे पैरामीटर सामिल हे। ए कड़ा मानक म खरा उतइया अस्पताल मन ल ही केंद्रीय स्वास्थ्य मंत्रालय डहार ले गुणवत्ता प्रमाण पत्र जारी करे जाथे।

केंद्रीय राज्यमंत्री-बैठक

केंद्रीय आवास अउ शहरी राज्यमंत्री तोखन साहू ह आज जांजगीर जिला मुख्यालय म विभागीय अधिकारी मनके बइठका लीन। ए बेरा श्री साहू ह अधिकारी मन ल गुणवत्तापूर्ण कार्य करे के निरदेस दीन। बइठक म सांसद कमलेश जांगड़े घलो सामिल रिहीन।

बइठक के बाद पत्रकार मनले बातचीत करत केंद्रीय राज्यमंत्री ह बतइन कि अधिकारी मन ल जिम्मेदारी के संग काम करे बर निरदेस दे गेहे। एक सवाल के जवाब म श्री साहू ह किहीन कि जल जीवन मिसन योजना म गड़बड़ी करइया मन ल नइ बक्शे जाय। ओमन किहीन कि विभाग म यदि कोई समस्या हे, त ओखर निराकरण करे जाय।

रेलवे सुरक्षा

दक्षिण पूर्व मध्य रेलवे के नागपुर-रायपुर-बिलासपुर अउ झारसुगड़ा सेक्सन ल कवच सुरक्षा तकनीक के भीतर सामिल करे गेहे। एखर बर निविदा मंगाय गेहे। ए परियोजना के अनुमानित मूल्य दू सौ बयानवे करोड़ रुपिया हे। निविदा अवइया पच्चीस नवंबर के खोले जाही।

ए परियोजना म स्टेसन कवच उपकरण के स्थापना, भवन निर्माण, टावर के स्थापना अउ ऑप्टिकल फाइबर केबल बिछाय के प्रावधान सामिल हे। एखरे संग धीमी नेटवर्क बर एक हजार पांच सौ तिरसठ रूट किलोमीटर क्षेत्र म कवच प्रणाली ल लागू करे बर बड़े इस्टीमेट ल घलो स्वीकृति प्रदान करे गेहे।

बतादन कि कवच प्रणाली भारतीय रेलवे के एक बड़का संरक्षा तकनीक हे, जेला रेलगाड़ी संचालन ल सुरक्षित अउ कुसल बनाय बर तियार करे गेहे। एखर उद्देश्य दुर्घटना ल रोकना अउ रेलवे के बुनियादी ढांचा ल मजबूत करना हे। कवच प्रणाली डहार ले ऑटोमेटिक तकनीक के जरिया अब दू गाड़ी के बीच आमने-सामने के टक्कर ले बचाव सुनिश्चित होही।

एनआईटी-अंतर्राष्ट्रीय सम्मेलन

राष्ट्रीय प्रौद्योगिकी संस्थान-एनआईटी रायपुर डहार ले आयोजित आर्टिफिसियल इंटेलीजेंस, कम्प्यूटर टेक्नोलॉजी, इंटरनेट ऑफ थिंग्स अउ डेटा एनालिसिस-एआईसीटीए म दूसरइया अंतर्राष्ट्रीय सम्मेलन के आयोजन सुरू हो गेहे। तीन दिन तक चलइया ए सम्मेलन के मुख्य अतिथि डॉक्टर वी.रमना रॉव ह ऑनलाइन ले डेटा एनालिसिस अउ आने-आने अनुप्रयोग ले होत बदलाव के उल्लेख करीन। ओमन बतइन कि ए सम्मेलन आधुनिक तकनीक म रुचि रखइया विद्यार्थी अउ सोधार्थी मन बर लाभदायक होही अउ तकनीकी के प्रगति म नवा आयाम स्थापित करही। उदघाटन समारोह म उपस्थित ब्रेन इंटरप्राइजेस के डायरेक्टर डॉक्टर अविनाश कुमार सिंह ह सम्मेलन एब्सट्रेक्ट पुस्तक के विमोचन करीन। उहें, एआईसीटीए के सचिव डॉक्टर राजेश डोरिया ह बतइन कि सम्मेलन म तीन प्राथमिक ट्रेक-आर्टिफिसियल इंटेलीजेंस, साइबर सिक्योरिटी अउ इंटरनेट ऑफ थिंग्स सामिल हे। कारीकरम म आईटी विभाग के एचओडी अउ सम्मेलन के अध्यक्ष डॉक्टर संजय कुमार ह बतइन कि ए बिसेस सम्मेलन म तेरह तकनीक सत्र, तीन बिसेस सत्र अउ

जनरेटिव ए.आई. म एक कार्यसाला के आयोजन करे जाही। जेमा देस-विदेस ले कई शोधकर्ता अउ बिसेसज्ञ भाग लिही।

भाजपा-समिति

भारतीय जनता पार्टी के प्रदेश इकाई ह जशपुर जिला के मनोरा ईलाका म गाज गिरे ले राजेन्द्र चौराट के मउत के बाद अंतिम संस्कार ल लेके होय झगड़ा के जांच बर चार सदस्यीय टीम बनाय हे। प्रदेश भाजपा उपाध्यक्ष शिव रतन शर्मा ल एखर अध्यक्ष बनाय गेहे अउ विधायक रेणुका सिंह गोमती साय अउ रायगढ़ के सांसद राधेश्याम राठिया ल समिति के सदस्य बनाय गेहे। ए समिति सात दिन के भीतर जांच करके अपन रिपोर्ट सौंपही।

जिले की चिट्ठी

आकाशवाणी रईपुर के प्रादेशिक समाचार एकांश डहार ले प्रस्तुत कारीकरम “जिले की चिट्ठी” के प्रसारण काली संझा छै बजके 5 मिनट ले छै बजके 10 मिनट तक करे जाही। ए कारीकरम ल प्रदेश के जम्मा आकाशवाणी केंद्र मन ह एके संघरा रिले करही। ए बखत के अंक म “जशपुर” जिला के गतिविधि के बारे म जानकारी दे जाही।

विशेष ओलंपिक-चयन

नई दिल्ली म अवइया अट्टारा ले तेईस नवंबर तक होवइया एशिया-पैसिफिक ओलंपिक प्रतियोगिता म छत्तीसगढ़ के छात्र मास्टर इबानन साहू के चयन बॉलिंग प्रतियोगिता बर होय हे। मास्टर इबानन साहू प्रतियोगिता म सामिल होय बर नई दिल्ली खाना हो गेहे। एखर पहिली, इबानन ह बॉलिंग प्रतियोगिता म राष्ट्रीय स्तर म स्वर्ण अउ रजत पदक जीत चुके हे। स्पेसल ओलंपिक एशिया प्रशांत पैसिफिक खेल ले संबंधित हे। जउन बौद्धिक विकलांग एथेलेट के भागीदारी व्यक्ति विकास अउ समावेस ल प्राथमिकता देथे। इबानन साहू के ए उपलब्धी ओखर अभिभावक अउ शिक्षक ही नही बल्कि पूरा छत्तीसगढ़ बर गरब के बात हे।

राष्ट्रीय प्रेस दिवस

आज देसभर म राष्ट्रीय प्रेस दिवस मनाय जावत हे। समाज म स्वतंत्र अउ उत्तरदायी प्रेस के महत्वपूर्ण भूमिका के सम्मान म हर बछर सोलह नवंबर के प्रेस दिवस मनाय जाथे। उन्नीस सौ छैंसठ म आज के दिन ले भारतीय प्रेस परिषद ह काम करना सुरू करे रिहीस। ए मउका म आने-आने कारीकरम के संग पत्रकारिता के क्षेत्र म उत्कृष्टता पुरस्कार प्रदान करे जाथे।